



25. juli 2022

UKA 2022/94

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Aalajangiiffigisassatut siunnersuut, Upernavimmi Uummannamilu, nunaqarfiillu eqqaaniittuni eqqaaveqarneq pillugu Naalackersuisut nalunaarusiussasut, nalunaarusiaq agguanneqassaaq UKA2023-imi. Nalunaarummi erseqqissarneqarsimassaaq, eqqakkanik isumaginnineq qanoq allatut suliarneqarsinnaanersoq, ukiuni arlalippassuarni atasinnaasunik, kiassarnikkut inaallagiaqarnikkullu iluaqutaasinnaasunik sanaartussagaanni, qanorlu aningaasaqarnikkut kinguneqassanersoq

(Inatsisartunut ilaasortaq Aqqalu C. Jerimiassen, Atassut)

Tungavilersuut

Erseqqissumik nassuerutigineqartariaqarpoq, nunatta avannaani eqqakkanik suliaqarniartarneq kanngunaannartumik akuersaarneqarsinnaanngitsumik inissisimavoq.

Erseqqissumillu oqartariaqarlutattaq, ESANI A/S nunatta kujasinnerusortaanut sikusartuunngitsunut taamaallaat annersumik naleqqussangaavoq.

Upernaaq 2022 Uummannaq amiilaarnaannartumik niuvingaqarpoq, tamannalu naalackersuisoqarfiup akimmisaartitsiuarneranik kinguneqarluni. Eqqakkat ikuallaqquneqanngillat, qaleriissaattut tippaattut tulukkanik, niuukkanik allarpassuarnillu uumasunik sullinernillu qammaallualaavipput. Illoqarfimmullu qularnanngitsumik tikeraanut takussunarluinnartumik isikkoqalerlutik, inuit silatiminni imaaliinnarlutik aneerasaarsinnaajunnaarput, neriniartarfiammi silataaniluunniit nerriviliiniarneq ajornakusuulerpoq.

Ila aalia assersuut ataasiinnaq uani eqqartoringa. Kullorsuaq tutulluinnartartoq ukiut tamaasa tusartuarparput, allanilu inoqarfinni annerni minnernilu avannarpasinnerusuniittuni eqqakkatigut ajornakusoorluinnartumik inissisimasoqarnera tusartualersimavarput.

Ila piviusorsiorluunngilaq nunatta avannaanut inoqarfinnut annernut sikusartoqarfinniittunut eqqakkanik "taamaallaat" katersuiviliortiternissaq, aap, pinngortitamut avatagiisinullu mingutsitsinnginnissamik siunertaqarneruneq paasinarluinnarpoq, ilaatigut ESANI A/S-ip pilersinneqarneranut toqqammaveqartumik. Taamaattorli eqqakkanik ikuallaasarnerup illoqarfinnut marluinnarnut inissiniarneqarnera apeqqusernartutut inissisimalerpoq, paasinarluarpoq qeqertarsuup tunuaniik kujasinnerusunut inissisimasunut inoqarfinnut atussangaanni.

Tassanngaanniilli avannamut eqqarsaatigeqqissagaanni, unammillingassaq annertuallaarsorinarsinnaavoq, ukiullu tamarluinnaasa eqqakkanik qannitsillugit, eqqaavissuillu ikumatinneqarneratigut inoqarfinni taakkunani najungaqtartut pujormik ulorianarluinnarsinnaasumik tipimiutinneqartarneri qaangerniarneqassappata, ikuallaavinnik suli allanik sanasoqartariaqarnera pisariaqarpoq.



Nalunaarusiakkut nalilernerqarsinnaasariaqarpoq, ilumut sumiiffinnut marluinnarnut eqqakkanik assartorniarneq sumiiffinnut sikusartoqarfiusunut naleqqussarneqarsimanersoq. Ulluinnarnilu inoqarfinni taakkunani ikuallaaqqusiunnaarneq qanoq kinguneqartitsinersoq erseqqarissumik nassuiassallugu.

Nunarput isorartoqingami, sumiiffimmut aaliangersimasumut tulluarsakkamik inatsisiliorsimanerup qanoq unammillernarsinnaatiginera takutiinnarpaa. Tamannalu naalakkersuisut paasiumaaraat Atassummit neriutingaarput.

Aningaasatigut ingerlatsinikkullu pisortanut kingunerisassai:

Nalunaarusiornissamut piffissaq atorneqartussa qkiup ilivitsup iluaniissinnaanissaa naatsorsuutigineqassaaq. AC-fuldmægtigellu ukiup affaanut sulineratut naleqassalluni 500.000kr.

Namminersortunut aningaasarsiornikkut allaffissornikkullu kingunerisassai:

Soqanngilaq.

Innuttaasunut aningaasarsiornikkut allaffissornikkullu kingunerisassai:

Soqanngilaq.